

इवनिंग डोगरी न्यूज़ बुलेटिन
समे 18:15 Hrs



Headlines

- प्रधानमंत्री नरेन्द्र मोदी होंरें इक टिकाऊ जीवन शैली पर मिशन लाइफ दे असर बारे इक लेख सांझा कीता ऐ।
- उपराज्यपाल मनोज सिन्हा होंरें अज्ज उत्तर-भारत दे सब्भनें शा बड्डे “झिड़ी” मेले दा उदघाटन कीता ते लोकें गी निस्वार्थ सेवा दी बतै पर टुरने दा प्रण पाने दा आहवान कीता।
- राष्ट्रीय सेहत मिशन दे डरैक्टर हुंदा आखना ऐ कि सरकार समूलचें जम्मू-कश्मीर च सेहत सेवाएं गी निग्गर ते बेहतर बनाने लेई दृढ़ संकल्प ऐ।
- जम्मू च इस बरे डेंगू दे मामलें च 66 प्रतिशत दी कमी दर्ज कीती गई ऐ।
- जम्मू सैलसफा विभाग नै इचछुक मकान मालकें गी आखेया ऐ जे ओ हैमस्टे लेई अपनियें सम्पतियें गी मैहकमे कन्नै दर्ज करान।



PM- Life

प्रधानमंत्री नरेन्द्र मोदी होंरें अज्ज केन्द्रीय मंत्री भूपेन्द्र यादव हुंदा इक लेख सांझा कीता-जिस च दस्सेया गया जे कियां “भारत लाइफ” (पर्यावरण लेई जीवन शैली) तमिनाडू दी एरी Tank प्रणालियें शा लेइयें राजस्थान दे जोहाड़ तोड़ी सर्दियें थमां चली आ’रदी संरक्षण प्रथाएं गी पुर्नजीवित करा रदा ऐ ते उनेंगी धरतै दी सेवा दे इक सचेत कम्में दे रुपे च पेश करा’रदा ऐ। इक सोशल मीडिया पोस्ट च प्रधानमंत्री होंरें भारत दे इक संदेश पर बी लौ पाई जे सच्ची स्थिरता गल्लबात शा नैई बल्कि पोषण थमां शुरु हुंदी ऐ।



LG -Jhiri Mela (Byte)

उपराज्यपाल मनोज सिन्हा होंरें अज्ज उत्तर-प्रदेश दे सब्भनें शा बड्डे “झिड़ी” मेले दा उदघाटन कीता। एह इक प्रतिष्ठित सांस्कृतिक ते आध्यात्मिक मेला ऐ जेड़ा करसान संत बाबा जितो हुंदे सम्मान च हर बरे आयोजित किता जंदा ऐ। इस मौके पर उपराज्यपाल मनोज सिन्हा होंरें इक तीर्थ यात्री सामुदायिक भवन ते 4 Modular Bus Stop गी बी लोकें दे निमित्त लाया ते मढ़ सब-डिविजन च सी.एस.आर. तैहत पैहले इंडोर स्पोर्ट्स कम्प्लैक्स दा नीह पत्थर रखेया। इस मौके पर

उपराज्यपाल होंरें लोकें गी निस्वार्थ सेवा दी बता गी अपनाने ते बाबा जितो दे सुखने दे न्यायपूर्ण ते समतापूर्ण समाज दे निर्माण लेई कम्म करने दा संकल्प लैने दा आहवान कीता। उनें आखेया

हफते तकर चलने आहला एह उत्सव देश-विदेश थमां शरदालुएं ते सैलानियें गी आकर्षित करोग। अधिकारियें सुरक्षा-यातायात प्रबंधन-चिकित्सा सहायता ते स्वच्छता सने सब्भै बवस्था पूरी लैतियां न।



MD NHM Reasi (Byte)

राष्ट्रीय स्वास्थ्य मिशन (NHM) जम्मू-कश्मीर दे मिशन निदेशक बसीर-उल-हक-चौधरी होंरें अज्ज स्वास्थ्य संस्थानें दे कम्मकाज दी समीक्षा करने-राष्ट्रीय स्वास्थ्य मिशन तैहत चला 'रदी पैहल दा आकलन करने ते जनता गी दिती जा रदी स्वास्थ्य सुविधायें दा जायजा लैने लेई जिला अस्पताल रियासी दा दौरा किता। इस दौरें दौरान मिशन निदेशक होंरें आपातकालीन वार्ड-आपरेशन थियेटर Maternity विभाग ते Diagnostic प्रयोगशालाएं सने अस्पताल दे बक्ख-बक्ख सैक्शन दा निरीक्षण कीता। उनें डाक्टरें-पैरामैडिकल अमले ते मरीजें दी संतुष्टी दे स्तर पर प्रत्यक्ष प्रतिक्रिया हासल कीती। चौधरी होंरें स्वास्थ्य सेवा प्रणाली गी मजबूत करने लेई सरकार दी प्रतिबद्धता पर लौ पाई। आकाशवाणी समाचार कन्नै गल्ल करदे होई एन.एच.एम दे मिशन निदेशक होंरें आखेया



GMC Doda – Thrombolysis (Byte)

डोडा स्थित सरकारी मैडिकल कालेज (जी.एम.सी) दे Medicine विभाग नै स्ट्रोक दे इक मरीज पर पैहली बारी थ्रोम्बोलिसिस प्रक्रिया सफलतापूर्वक करियै इक बड्डी चिकित्सा उपलब्धि हासल कीती ऐ। एह उपचार पैहले छड़ा श्रीनगर च गै उपलब्ध हा। डाक्टर गोविंदर कुमार हुंदे मताबक हाल च गै इक मरीज गी तेज ब्रेन स्ट्रोक करी जी.एस.सी. डोडा आन्दा गया हा-जिंदे शरीर दे इक हिस्से च लकवा होई गया हा-मैडिकल टीम नै तुरत सी.टी स्कैन किता ते सब्भै जरूरी प्रक्रिया पूरी करने दे बाद थ्रोम्बोलिसिस उपचार शुरु कीता। समय पर किते गे उपचार करी मरीज नै सकारात्मक प्रतिक्रिया दिती ते बिजन कुसे स्थाई विकलांगता दे ठीक होई गया। डाक्टर गोविंदर होंरें आखेया



Vande Matram

किशतवाड़ दे सरकारी डेंगू कालेज दी सीनियर डिविजन ते सीनियर विंग एन.सी.सी. इकाई नै देश भक्ति गीत “वंदे मातरम” दे 150 बरे पूरे होने दे मौके पर इक कला ते चित्रकला प्रतियोगिता दा आयोजन कीता। कारजक्रम दी शुरुआत एन.सी.सी. कैडटें आसेया “वंदे मातरम” दे मिट्ठे ते भावपूर्ण गाने कन्नै होई- जिस करी पूरे वातावरण गी देशभक्ती ते राष्ट्रीय गौरव दी भावना कन्नै

भरी दिता। लैफ्टिनेंट पृथ्वी राज होरें उपस्थित लोकें गी सम्बोधित किता ते “वंदे मातरम” दे ऐतिहासिक महत्व दे बारे बी दस्सेया। एस.डी. ते एस. डब्ल्यू दोने जिले दे 50 शा मते एन.सी.सी. कैडेटें इस प्रतियोगिता च उत्साहपूर्वक हिस्सा लैता।



Dengue-Cases Drop

जम्मू नगर निगम दे कमिशनर डॉ. देवांश यादव होरें दस्सेया ऐ कि जम्मू च डेंगू दे मामले 66 फीसदी घटी गए न। एह कमी विभाग राएं चला'रदे जत्नें दे असर गी दर्शादा ऐं उनें जम्मू नगर-निगम ते सेहत विभाग दी टीमें दे अनथक जत्नें दी सराहना कीती। उनें आखेआ जे इनें टीमें मच्छरें दे पैदा होने दी थाहरें गी घट्ट कीता ऐ। जागरूकता कैंप लाए न ते समें-सिर चिकित्सा जांच कीती ऐ। अधिकारियें नागरिकें गी जोर पाड़यै गजारिश कीती ऐ जे ओह इस्सै चाल्ली सफाई आहले हीले बरतन तां जे जम्मू शैहरै गी डेंगू थमां बचाया जाई सकै।



Jammu-Home stays

जम्मू सैलसफा विभाग नै इक्क नमीं पहलकदमी दी शुरूआत कीती ऐ जेदे तैहत घरै दे मालिक अपनी संपत्ति गी होमस्टे च बदली सकदे न जेदे आस्तै उनेंगी पंजीकरण करोआना होग। ओह इनें होम-स्टे च परौहनें दी खातिरदारी करी सकदे न। इस प्रोग्राम दा मकसद मकामी सैलसफा गी बढ़ावा देना ऐ कीजे एहदे तैहत यात्री जम्मू दे कुदरती शलैपे, मकामी खान-पान ते रीति-रिवाजें दा नन्द लेई सकदे न। होम-स्टे च रूची रखने आहले लोक अपने कागज पत्तर जियां के जमीन दी मालकी दे कागज, सर्टिफिकेट, आधार कार्ड समेत होर जरूरी कागज पंजीकरण आस्तै जमा करोआई सकदे न। पंजीकरण ते तफसीली जानकारी आस्ते ओह डायरेक्टोरेट ऑफ टूरिज्म जम्मू दे दफ्तर जाई सकदे न जा फही 1800-890-8457 उप्पर फोन करी सकदे न।



GST-Healthcare

जी.एस.टी सुधारें दे तैहत सरकार नै सेहत सरबन्धी खेतरें च टैक्सें च खरी मती कटौती कीती ऐ। जरूरी दोआइयें पर जी.एस.टी दी दर गी 12 फीसद थमां घटाइयै 5 फीसद करी दिती गोआ ऐ। तोआई, 33 जीवन रक्षक दवाइयें गी जीएसटी मुक्त करी दिता ऐ जेदे कन्नै परानी ते गंभीर बमारियें दा ईलाज किफायती होई गोआ ऐ। चिकित्सक समेंयान जियां डायगनॉस्टिक किट्टां, थर्मामीटर, पट्टियें समेत होर चीजें उप्पर जीएसटी 12 फीसद थमां घटाइयै 5 फीसद करी दिता गोआ ऐ। एहदे अलावा सेहत ते जीवन बीमा गी जीएसटी मुक्त करी दिता ऐ। इन्दे उप्पर पैहले 18

फीसद टैक्स लाया जंदा हा ते टैक्समुक्त होने कन्नै मरीजें दे पालिसीधारकें गी खरा मता लाह पुज्जोग। आकाशवाणी कन्नै हून गल्ल करदे होई इक फार्मासिस्ट नितिन सोनी होरें आखेआ



Rajouri Accident

राजौरी जिले च अज्ज जम्मू-राजौरी-पुंछ जरनैली सिडकै पर इक मिनी बस दे परतोई जाने कारण घट्टो-घट्ट 28 लोक जखमी होई गे- जिंदे च ज्यादातर विद्यार्थी दस्से जा करदे न। अधिकारिक जानकारी मुजब एह हादसा उस्सलै पेश आया- जिसलै राजौरी जा'रदी एह मिनी बस ठंडी कस्सी कश ड्राइवर दा कंट्रोल नैई रौहने कारण सिडकै पर परतोई गई। हादसा होंदे गै लोक मदद लेई उत्थे पुज्जी गे। 26 विद्यार्थियें सनें सब्भनें घायलें गी राजौरी दे सरकारी मैडिकल कालेज अस्पताल पुजाया गया- जित्थे उन्दा इलाज चलै करदा ऐ। गंभीर तौरा पर घायल दंऊ विद्यार्थियें- 15एं बरे दी अलीज़ा ते 11एं बरे दे साकिब गी जम्मू मैडिकल अस्पताल मुंतकिल करी दिता गया ऐ। इस बारे आकाशवाणी गी जानकारी दिंदे होई राजौरी मैडिकल कालेज दे डिप्टी सुपरिन्टेडेंट डाक्टर जावेद इकबाल होरें दस्सेया



Weather

जम्मू-कश्मीर च अज्जै दपैहरी दे बाद किश टांवी-टांवी थाहरें पर हलकी कणी-कणोन होआ रदी ऐ। मौसम विभाग मुजब उच्चिएं धारें पर संझा चिरें ते राती लै हल्की बरखा ते बर्फबारी होने दा इमकान ऐ। संझा'लै किश थाहरें पर बिजली चमकना ते अंधी झक्खड़ झुल्ली सकदा ऐ ते दिनें ते राती दे तापमान च गिरावट औने दी मेद ऐ। मुतल्लका प्रशासन आस्सेआ करसानें गी पैहले गै सलाह दिती गई ऐ जे ओह 4 ते 5 नवंबर गी अपनी गतिविधिएं गी रोकिए रक्खन तां जे कुसै चाल्ली दा नुकसान उनेंगी नैई होऐ। लोकें गी बी सलाह दिती गई ऐ जे ओह इस अवधि दरान सौहगे ते सतर्क रौहन। कल दपैहरी तगर मौसम बदलोखड़ा, किश थाहरें हलकी बर्फबारी ते बरख दे आसार दस्से गेदे न।

